

四庫全書

史部

欽定四庫全書

史部

大事記解題卷三

詳校官編修_臣溫汝适

刑部郎中_臣許兆椿覆勘

總校官進士_臣朱鈐

校對官庶吉士_臣王朝梧

謄錄監生_臣王翰

欽定四庫全書

大事記解題卷二

宋 呂祖謙 撰

周威烈王二十三年九鼎震

解題曰九鼎大禹所鑄三代所傳王室之大寶鎮也
是歲大夫篡盜受王命者三國蓋天下之大變也九
鼎安得不震乎天下之戰國七秦變於戎者也楚變
於蠻者也燕變於狄者也魏趙韓齊皆大夫竊國者
也今一旦而頓命其三焉三代之禮樂刑政自是而

廢古先聖賢之後周室所褒封者自是而盡戎狄盜賊自是而橫行中國人事之變如此天地之氣豈得不為之動哉天人之際可謂無間矣所以告人者可謂深切著明矣

魏斯趙籍韓虔為諸侯

解題曰此司馬氏通鑑之所始也稽古錄曰先是大夫之專國者多矣未有敢自君者至是三大夫始受天子之命禮之紀綱盡矣自此卷以後凡事之本末

當求之通鑑訓釋名義參考同異蒐補闕遺當求之

解題

本未全在通鑑者解題更不重出通鑑雖已載解題間有訓釋參考或通鑑未備解題間有增

補者本未皆書餘見通鑑所記大事不在通鑑者各標所出書

楚聲王圍宋

解題曰自是楚皆書王按呂氏春秋慎勢篇莊王圍

宋九月康王圍宋五月聲王圍宋十月楚三圍宋矣

而不能亡莊王康王皆在大事記前聲王事今附於

聲王弑之前一年

周威烈王二十四年國人立其子類

解題曰楚悼王名年表作類世家作熊疑類者通中國之名也疑熊者蠻夷之名而稱於其國者也楚之君世以熊為名蓋蠻夷之俗如靈王名熊虔而春秋止書虔不以蠻夷之語通中國也世家書楚之諸君昭王之名軫惠王之名章是舉其通中國之名也悼王之名熊疑宣王之名熊良夫是舉其蠻夷之名也蓋互見之也

周安王二年桑丘

解題曰年表作桑丘世家作乘丘

陽翟

解題曰史記正義云括地志云陽翟屬潁川郡夏禹之國

周安王三年魏虢山崩

解題曰在弘農陝縣故虢國史記書於魏年表世家是時屬魏也

楚歸榆關

解題曰歸者昔取之而今歸之也

史記正義曰榆關在鄭之南大梁之

西

周安王四年楚伐鄭敗鄭師圍鄭鄭繻公殺其相駟子

陽

解題曰駟氏鄭舊族也楚年表書敗鄭師圍鄭鄭人

殺子陽蓋殺子陽以說也前年楚方歸榆關于鄭今

年乃圍之意者子陽干犯大國而見討與子陽專國

諸子或謂之君繻公之微弱能殺之何也蓋平日狠暴積怨於民至是因大國之討以發其怒名為君討實則民殺之耳故列子謂民作難而殺子陽世家書楚伐周鄭殺子陽以鄭為周字之誤也

列禦寇李耳揚朱墨翟

解題曰耳老子也孔子嘗問禮焉今載於曾子問者與五千言殊不類蓋告孔子者其所職著於書者自其所見也列子不受鄭子陽粟是與子陽同時今附

於此列子多引黃帝書蓋古之微言傳久而差者也
玄牝一章今見於老子此戰國秦漢以來所以多喜
並言黃帝老子而謂之黃老也孔子定書而始堯典
其有以哉以列子所載楊朱遇老子老子中道而嘆
一章觀之則朱受學於老子不疑朱之言見於列子
者固多後人所附益為我之說亦畧可見矣史記謂
墨翟或曰並孔子時或曰在其後雖不可考然楊墨
之說肆行於天下必在春秋後蓋異端之說非王教

盡廢不能興也

周安王五年盜殺韓相俠累

解題曰盜聶政也按史記韓世家烈侯三年聶政殺韓相俠累十三年烈侯卒子文侯立文侯十年卒子哀侯立六年韓嚴弑其君哀侯是聶政之刺俠累與哀侯之弑相去遠矣而聶政傳乃謂嚴仲子事韓哀侯與韓相俠累有郤嚴仲子恐誅亡去居魏使政刺俠累與世家不合蓋其事偶同故刺客傳誤以為哀

侯之時耳

戰國策曰東孟之會韓王及相皆在焉肅政刺韓侯兼中哀侯又曰東孟之會肅政

刺相兼中哀侯許異薨哀侯而殯之是故哀侯為君而許異終身相焉考之世家哀侯既殺其子懿侯即立許異將誰相哉侯累既死烈侯猶在其位十年謂之終身相之可也然則東孟之會肅政刺相魚中其君乃烈侯三年之事但戰國策誤以為哀侯耳

周安王七年繇諸

解題曰繇諸西戎之別也

周安王九年魏伐鄭城酸棗

解題曰取鄭地而城之也

史記正義云括地志云酸棗故城在滑州酸棗縣北

十五里古酸
棗縣南也

注

解題曰司馬彪曰河南梁縣有注城

周安王十一年宜陽

解題曰史記正義曰括地志云宜陽在洛州福昌縣

東十四里

齊田和徙其君康公于海上

解題曰按田敬仲世家齊康公立十四年淫於酒婦

人不聽政太公乃遷康公於海上食一城以奉其先祀

魏韓趙敗楚師于大梁榆關

解題曰按楚世家三晉伐楚敗我大梁榆關大梁魏地不知楚追三晉之師至於是與或者楚伐魏而韓趙救之世家誤以為三晉伐楚與索隱曰榆關當在

大梁之西

史記正義曰大梁今汴州浚儀也

林氏與秦平

解題曰按世家楚厚賂秦與之平蓋為三晉所敗而求援於秦也

周安王十二年秦與晉戰武城

解題曰晉三晉也秦記不書何國

襄陵

解題曰徐廣曰在南平陽縣

史記正義曰括地志云在晉州臨汾縣東南

平陸

解題曰徐廣曰東平平陸

史記正義曰兗州縣也平陸城即古厭國

周安王十三年陰晉

解題曰水經注渭水逕華陰縣故城北春秋之陰晉也秦惠王五年改曰寧秦今屬華州

齊田和會魏文侯楚人衛人于濁澤

解題曰按世家太公與魏文侯會濁澤求為諸侯魏文侯乃使使言周天子及諸侯請立齊相田和為諸

侯周天子許之

史記正義曰括地志云濁水源出蒲州解縣東北平地

周安王十五年秦伐蜀取南鄭

解題曰本紀書秦伐蜀年表書蜀伐秦取南鄭今從本紀

魏文侯薨

解題曰孟嘗君問於白圭曰魏文侯名過於桓公而功不及五霸何也白圭對曰魏文侯師子夏敬田子方友段干木此名之所以過於桓公也卜相則曰成與璜孰可此功之所以不及五霸也

古史曰魏文侯內師事卜子夏

友田子方段干木被服儒者身無失德用吳起西門豹李悝盡力耕戰氏賴以富而敵不敢犯外以禮與

信交援諸侯與韓趙無怨終其身魏人不知戰國之患雖非盛德之主使當平世得行其志雖西漢文帝不能遠過也

周安王十六年田齊太公和元年

解題曰齊猶未滅故稱田齊以別之至康公卒呂氏絕祀乃去其氏

初命齊大夫田和為諸侯

解題曰按世家康公之十九年田和立為齊侯列於周室紀元年序傳曰王後不絕舜禹是說維德休明

苗裔蒙烈百世享祀爰周陳杞楚實滅之齊田既起
舜何人哉子長所序實因左氏盛德必百世祀之論
此蓋當時習俗之見左氏不能自拔而載之耳春秋
末士大夫不知大義如此尚何言者然其尊古先神
明之胄乃故家遺俗相傳之語特施於篡逆之田氏
則非其所也方是時苟有王者肇修人紀明逆順以
示之則其敬聖賢嚴世系之風俗乃封建之所憑藉
而久存者也

趙始都邯鄲

解題曰西漢志云趙敬侯自中牟徙此張晏曰邯鄲山在東城下城郭從邑故加邑云師古曰邯音寒

趙公子朝作亂

解題曰朝武公子也武公薨其子不得立故作亂不勝出奔魏與魏襲邯鄲為趙所敗而去

吳起曰在德不在險

解題曰吳起戰國初以善戰稱者也

史記正義曰西河即龍門河也

魏以田文為相

解題曰田文與孟嘗君姓名適同而在前者也呂氏春秋作商文所載吳起問答與史記畧同按吳起傳田文既死公叔為相尚魏公主而害吳起餘並見通鑑說苑載楚王以吳起為苑守居一年以為令尹又載起為苑守行縣適息問屈宜臼事息既為苑之屬縣則苑之為郡所以扞北方也

周安王十七年秦庶長弑出公及其母

解題曰庶長失其名按呂氏春秋秦小主夫人

小主即出

公夫人即其母也

用奄變羣賢不悅自匿百姓鬱怨非上公

子連亡在魏

是時河西在魏

聞之欲入因羣臣與民從鄭所

之塞

鄭開中之鄭也

右主然守塞弗入

高誘曰右主然秦守塞吏也弗內公子連

也曰臣有義不兩主公子勉去矣公子連去入翟從

焉氏塞

塞在安定

茵改入之

高誘曰茵改亦守塞吏也入之內公子連也

夫人

聞之大駭

不言出公其母專政也

令吏興卒卒與吏其始發也

皆曰往擊冠中道因變曰非擊冠也迎君主也公子

連因與卒俱來至雍圍夫人夫人自殺

不言出公從可知也公

子連立是為獻公怨右主然而將重罪之德菑改而

欲厚賞之監突爭之曰不可

高誘曰監突秦大夫也

秦公子之

在外者衆若此則人臣爭入亡公子矣此不便於主

獻公以為然故復右主然之罪而賜菑改官大夫

官大夫

夫秦爵非高秩也

賜守塞者人米二千石

右主然所部之卒也

史記載

庶長弑出公及其母乃迎獻公呂氏春秋載獻公既

入乃弑之先後雖不同然右主然菑改所載事不韋

以秦相著書所載必可據也

史記正義曰河西謂同華等州

魏城安邑

解題曰魏都也按前漢地理志魏絳自魏徙安邑鹽池在西南後漢志鹽池猗氏長六十四里猗氏蓋安邑之屬邑也

靈丘

解題曰徐廣曰按前漢地理志代郡有靈丘縣

史記正義

曰蔚州理縣也

陽城

解題曰史記正義云陽城卽洛州夏禹所都今河南

府

韓伐宋執宋公

解題曰按年表伐宋到彭城執宋君

周安王十八年秦止從死

解題曰秦自武公以人從死之後遂以為常至獻公
即位而始止之也

周安王十九年秦城櫟陽徙都之

解題曰漢之萬年也屬左馮翊按孝公令往者厲蹠
簡公出子之不寧國家內憂未遑外事三晉攻奪我
河西地獻公即位鎮撫邊境徙治櫟陽且欲東伐復
穆公之故地修穆公之政令

史記正義曰括地志云
櫟陽故城一名萬年城

今京兆府
櫟陽縣

兔臺

解題曰史記正義曰在河北

周安王二十年趙圍衛衛慎公乞師于魏

解題曰按戰國策蘇秦謂齊湣王曰昔者趙氏襲衛車舍人不休傳衛國城衛八門土而二門墮矣此亡國之形也衛君跣行告邈於魏魏王身被甲底劍挑趙索戰邯鄲之中騖河山之間亂衛得是藉也亦收餘甲而北面殘剛平墮中卒之郭衛非強於趙也譬之衛矢而魏弦機也藉力魏而有河東之地趙氏懼楚人救趙而伐魏戰於州西出梁門軍舍林中馬飲於大河趙得是藉也亦襲魏之河北燒棘溝墜黃城

故剛平之殘也中牟之墮也黃城之墜也棘溝之燒也此皆非趙魏之欲也然二國勸行之者何也衛明於時權之藉也所謂剛平之殘中牟之墮即趙世家今年齊魏為衛攻我取我剛平之事也棘溝之燒即趙世家明年偕兵於楚伐魏取棘溝之事也黃城之墜即趙世家敬侯八年拔魏黃城之事也

史記正義曰剛平蓋

在河
北

周安王二十一年

解題曰是年秦獻公之四年本紀書正月庚寅孝公
生孝公興邦之主秦人重而記之本紀蓋采秦史也
楚悼王薨宗室大臣攻吳起殺之

解題曰太史公曰語曰能行之者未必能言能言之
者未必能行吳起說武侯以形勢不如德然行之於

楚以刻暴少恩亡其軀悲夫餘見通鑑

呂氏春秋曰
墨者孟勝善

荆之陽城君陽城君令守於國毀璜以為符約曰符
合聽之荆王薨羣臣攻吳起兵於喪所陽城君與焉
荆罪之陽城君走荆收其國孟勝曰受人之國與之
有符今不見符而力不能禁不能死不可其弟子徐

弱誅孟勝曰死而有益陽城君死之可矣無益也而絕墨者於世不可孟勝曰不然吾於陽城君也非師則友也非友則臣也不死自今以來求嚴師必不於墨者矣求賢友必不於墨者矣求良臣必不於墨者矣死者所以行墨者之義而繼其業者也我將屬鉅子於宋之田襄子田襄子賢者也何患墨者之絕世也徐弱曰若夫子之言弱請先死以除路孟勝因使二人傳鉅子於田襄子孟勝死弟子死之者百八十人二人已致令於田襄子遂反死之墨氏雖邪說所以盛行於當時者蓋其徒以死守之也戰國輕生尚氣之俗於此亦可見田橫之事有自來矣夫

棘蒲

解題曰史記正義云今趙州平棘縣古棘蒲邑

周安王二十二年鄭伐韓

解題曰年表書韓文侯七年鄭取晉世家書韓文侯七年鄭反晉晉者三晉之通稱也鄭是時服屬於韓故世家謂之反也

周安王二十三年齊康公薨于海上田氏遂滅齊

解題曰齊姜姓其先四岳佐禹平水土封於呂武王

已平商而王天下封師尚父於齊營丘

史記正義曰臨淄古營丘

之地括地志云營丘在青州臨淄北百步外城中水經注云臨淄城中有丘淄水出其前經其左故有營

丘之名今青州臨淄縣

自太公至康公凡二十九世為陳氏所

滅齊景公與晏子坐于路寢公嘆曰美哉室其誰有此乎晏子曰敢問何謂也公曰吾以為在德對曰

如君之言其陳氏乎陳氏雖無大德而有施於民豆區釜鍾之數其取之公也薄其施之民也厚公厚歛焉陳氏厚施焉民歸之矣後世若少情陳氏而不亡則國其國也已公曰善哉是可若何對曰唯禮可以已之在禮家施不及國民不遷農不移工賈不變士不濫官不酒大夫不收公利公曰善哉我不能矣吾今而後知禮之可以為國也對曰禮之可以為國也久矣與天地並君令臣共父慈子孝兄愛弟敬夫和婦柔姑慈婦聽禮也使景公而用此言齊豈至於不祀哉東坡蘇氏軾曰嬰能知之而莫能為之非不賢也其浩然之氣養而無害塞前漢地理志曰齊地虛乎天地之間者不及乳盆也

危之分野也東有淄川東萊瑯琊高密膠東南有泰山城陽北有千乘清河以南渤海之高樂高城重合陽信西有濟南平原皆齊分也臨淄名營丘故齊詩曰子之營兮遭我乎懷之間兮又曰俟我於著乎而此亦其舒緩之體也吳札聞齊之歌曰泱泱乎大風也哉其太公乎國未可量也古有分土分民

顏師古曰

有分土者謂立封疆也無分人者謂通往來不常厥居也

太公以齊地負海舄鹵

少五穀而人民寡乃勸以女工之業通魚鹽之利而

人物輻湊後十四世桓公用管仲設輕重以富國合
諸侯成霸功身在陪臣而取三歸故其俗彌侈織作
冰紈綺繡純麗之物號為冠帶衣履天下初太公治
齊修道術尊賢智賞有功故至今其土多好經術矜
功名其失夸奢朋黨言與行繆虛詐不情急之則離
散緩之則放縱

史記貨殖傳曰臨淄亦海岱之間一都會也其俗寬緩澗達而足智好議

論地重難動搖怯於衆聞勇於持刺故多劫人者大國之風也其中具五民如淳曰游子樂其俗不復歸故有五方之民也此其疆土風俗之大畧也自田和遷康公

海上既篡齊而有之矣史記年表每歲猶繫康公之
年至於今年康公卒始書田氏遂并齊而有之何邪
蓋康公雖為田氏所篡僅食一城然未嘗為天子所
絕其位號猶在也故齊太公卒則繫之康公二十四
年而書田和卒田齊伐燕取桑丘則繫之康公二十
五年而不別其為田齊其書法可謂正矣至田敬仲
世家乃書是歲故齊康公卒絕無後奉邑皆入田氏
方見其實焉

康公所食者一城而曰皆入田氏者蓋一城之屬邑固多也齊一年所居成聚

二年成邑三年成都邑大於聚都大
於邑戰國之所謂城即古所謂都也

黃城

解題曰杜預曰陳留外黃縣東有黃城

齊桓公薨

解題曰按扁鵲傳扁鵲過齊齊桓侯客之扁鵲曰君
有疾不治將深桓侯不使治遂死傳玄曰是時齊無
桓侯非也桓侯即田齊桓公也田氏篡齊韓魏趙篡
晉周王因命之為諸侯皆諸侯爵也春秋之時諸侯

死而謚者多僭稱公三晉與田氏篡國之初其死而謚皆稱本爵未敢用春秋之僭制韓烈侯景侯虔之子也魏武侯文侯斯之子也趙武侯烈侯籍之子也篡國再世尚止稱本爵自是而後則淫名偽號無復限極矣田桓公亦篡國再世扁鵲傳稱桓侯乃當時所稱至於田敬仲世家所謂太公桓公皆威王之後追書耳

周安王二十四年澮

解題曰史記正義曰括地志云澮水縣在絳州翼城

縣東南

魏韓趙伐齊

解題曰按齊世家三晉因齊喪來伐我靈邱魏世家云使吳起誤也起死在安王二十一年

秦初為市

解題曰秦東遷後始建國逼於戎狄未脩朝市之制故獻公為市而商鞅築冀闕也

周安王二十五年茲方

解題曰史記正義曰古今地名云荊州松滋縣古鴈
滋地即茲方也

楚為扞關以拒蜀

解題曰扞者扞敵之扞非關名也蘇秦說趙曰距沙
邱而至鉅鹿之界三百里距於扞關此趙扞敵之關
非獨楚有之也然趙之扞關陸道之關也楚之扞關
水道之關也張儀為秦脅楚其辭曰舫船載卒一舫

載卒五十人下水而浮一日行三百餘里不至十日而距扞關扞關驚則從境以東盡城守矣此正論自蜀泛江伐楚之道也李熊說公孫述曰東守巴郡距扞關之口亦謂此關也

史記正義曰括地志云扞關峽州巴山縣界

魯穆公薨

解題曰據年表穆公薨在烈王元年通鑑考異曰漢律歷志魯君在位之年與魯世家注皇甫謐所紀歲次皆合今從之

趙與中山戰于房子

解題曰中山至是復見不知其復國之年

史記正義曰房子趙

州房子是

周安王二十六年魏韓趙共徙晉靖公食一城而分其地

解題曰按世家靖公二年魏武侯韓哀侯趙敬侯滅

晉而三分其地

楚年表書三晉滅其君

所分者絳與曲沃之地

也其後又書趙與韓魏分晉封晉君於端氏趙肅侯

元年又書奪晉君端氏徙處屯留水經注竹書紀年
梁惠成王元年韓共侯趙成侯遷晉桓于屯留竹書
所謂晉桓卽史記所謂晉靖公也徙屯留之歲史記
竹書所載雖不同要之三晉既分晉地尚奉靖公以
一城其後奪其城徙之屯留始夷於編戶矣田氏篡
齊而徙康公食一城三家篡晉而徙靖公食一城事
體畧同然田氏猶待康公死無後而收其城三晉不
待靖公之死而生奪其城使為庶人則又不如田氏

也今用齊年表書法移三家滅晉於奪靖公所食城

徙處屯留之年

按汲冢紀年書晉桓公邑哀侯於鄭韓滅鄭在史記世家三晉滅晉之次

年以竹書攷之靖公雖食一城韓徙都於鄭尚假靖公之命晉何嘗滅乎史記之書誤矣

中人

解題曰徐廣白中山唐縣有中人亭

史記正義曰括地志云中山故

城一名中人亭在定州唐縣東北

周烈王元年韓滅鄭

解題曰鄭姬姓周宣王二十二年封弟友於宗周畿

內之鄭

今華州鄭縣

是為桓公及幽王時遷於河南新鄭

水經注竹書紀年王子多父伐剋之乃居鄭父之丘名之曰鄭是為桓公然則新鄭即剋之墟也今為

鄭州新鄭縣

左洛右濟前華後河食溱洧焉自桓公至鄭

君凡二十三世前漢地理志鄭與韓同星分本高辛

氏火正祝融之墟成臯滎陽潁川之崇高陽城皆鄭

分也土陘而險山居谷汲男女巫聚會故其俗淫鄭

詩曰出其東門有女如雲又曰溱與洧方灌灌兮士

與女方秉菅兮恂眵且樂惟士與女伊其相謔此其

風也序傳曰桓公之東太史是庸及侵周赧王人是
議祭仲要盟鄭久不昌子產之仁紹世稱賢三晉侵
伐鄭納於韓潁濱蘇氏曰渾罕曰姬在列者蔡及曹
滕其先亡乎偏而無禮鄭先衛亡偏而無法作丘賦
靖刑書
皆廢法以便
事故曰無法夫無禮則不能自立無以止大國之暴
無法則不能字人民將不懷大國不予不折必仆民
不予將以其力自斃此其所以為亡之先後也

秦初為戶籍相伍

解題曰昔未有而今始作之也五家為比五比為閭
五閭為隣五隣為里皆所謂相伍也

周烈王三年六月趙雨雪

解題曰今之四月也

燕敗齊師于林狐

解題曰燕在春秋世服屬於齊至是乃敗齊師雖適
當威王初立不親政之時亦其强大之漸也

燕世家
昌伐齊

敗于林營今
從年表通鑑

魯伐齊入陽關

解題曰陽關本魯地後為齊所取杜預曰在泰山郡

鉅平縣東

史記正義曰括地志云在兗州博城縣南西臨汝水

博陵

解題曰史記正義云在濟州西界

宋桓公辟兵立

解題曰賴濱蘇氏曰按索隱汲冢紀年作桓公辟兵

莊子曰桓公出前驅呼辟蒙人以為狂而史記作辟

公辟兵且名辟兵而謚辟事必不爾史記蓋誤也

周烈王四年趙以大戊午為相

解題曰肅侯十六年游大陵出於鹿門大戊午扣馬
曰耕事方急一日不作百日不食肅侯下車謝後此
蓋三十餘年未知其猶為相歟或去位而猶諫歟味
其諫語其相業可知矣

趙伐衛取鄉邑七十三

解題曰按魏年表伐衛取都鄙七十三蓋都鄙之邑

也邑地小故數多如宋與向戌邑六十之類

北蘭

解題曰史記正義曰在石州趙之西北

周烈王五年魯陽

解題曰屬南陽

史記正義曰括地志云汝州縣以魯出為名

韓嚴遂弑哀侯國人立其子懿侯

解題曰哀侯之弑傳記多誤以為聶政已見本條按史記正義紀年云晉桓公邑哀侯於鄭韓山堅賊其

君哀侯而立韓若山若山即懿侯也韓山堅即韓釐也晉桓公即晉靖公也

高安

解題曰史記正義曰在河東

周烈王六年趙伐齊取甄衛伐齊取薛陵

解題曰按世家齊威王召阿大夫與語曰昔日趙攻甄子弗能救衛取薛陵子弗知然則甄與薛陵其阿之屬邑歟

史記正義曰甄即濮州甄城縣北

齊威王封即墨大夫烹阿大夫

解題曰按世家滑稽傳威王初即位以來不治委政

卿大夫九年之間諸侯並伐國人不治於是威王朝

諸縣令長七十二人召即墨大夫

即墨今萊州即墨縣

而封之

召阿大夫

阿今鄆州東阿縣

及其左右嘗譽者皆并烹之餘

並見通鑑

齊威王來朝

解題曰魯仲連謂辛垣衍曰昔者齊威王率天下諸

侯而朝周周貧且微諸侯莫朝而齊獨朝之居歲餘
周烈王崩齊後往周怒赴於齊所謂率天下諸侯而
朝周者率先朝周為諸侯倡也烈王崩在明年

韓分鄭地長子與趙

解題曰趙世家是年書攻鄭敗之以與韓韓與我長
子按鄭滅六年矣安得復有鄭意者韓滅鄭之時趙
與有勞焉至是韓始以地酬其功歟長子屬上黨
韓懿侯趙成侯伐魏與魏瑩戰于濁澤

解題曰瑩惠王也按世家初武侯卒也子瑩與公中

緩爭為太子公孫頎自宋入趙自趙入韓謂韓懿侯

曰魏瑩與公中緩爭為太子君亦聞之乎今魏瑩得

王錯挾上黨固半國也因而除之破魏必矣

公孫頎王錯皆

魏大懿侯說乃與趙成侯伐魏戰于濁澤

長社有濁澤

大

敗魏君

也瑩

遂圍魏趙謂韓曰除魏君立公中緩割地

而退我且利韓曰不如兩分之趙不可韓不說以其

師夜去趙亦歸餘見通鑑公孫頎說韓懿侯之時名

惠王而謂與公中緩爭為太子未葬未即位之稱也
韓趙圍魏之時謂惠王為魏君已葬已即位之稱也
惠王既在魏都而又挾上黨分國之半公中緩雖不
知其所據何地其亦分國之半歟及韓趙退師之後
始殺緩而位定耳汲冢紀年惠王二年又書魏大夫
王錯出奔韓錯惠王之黨位定而反出奔其事雖不
可考或者恃功而見逐歟年表通鑑皆載濁澤之戰
於惠王二年當以魏世家為正

汲冢紀年云魏武侯
元年封公中緩趙侯

種韓懿侯伐我七年公中緩如邯鄲以作難通鑑云釐遂殺公中緩而立當狄

魏趙韓滅晉徙靖公於屯留

解題曰三晉徙靖公於屯留

今潞州屯留縣

則奪其所食城

而降於家人矣趙世家載於肅侯元年當周顯王二十年竹書紀年載於梁惠王元年當周烈王六年竹

書蓋魏國當時之史其載前世治亂雖多訛謬至於

書戰國事必可信也今從之

索隱曰紀年云趙成侯韓共侯遷桓公於屯留

已後更無晉事趙世家成侯十六年又書與韓魏分晉封晉君以端氏蓋世家之誤也

晉姬姓

周成王封其弟叔虞於唐唐在河汾之東方百里

正義

曰世本云居鄂宋忠云鄂地今在大夏括地志云故唐城在絳州翼城縣西二十里故鄂城在慈州昌寧縣東二里與絳州夏縣相近然封于河汾二水之東方百里正合在晉州平陽縣不合在鄂未詳唐

叔子燮徙居晉改國號晉侯

正義曰國都城記云唐叔虞之子燮父徙居晉

水傍今并州治故唐城即燮父初徙之處其城南半入州城中削為坊城牆北半見在故唐城堯所築非唐叔始封也詩譜云叔虞子燮父以堯墟南有晉水改曰晉侯自唐叔至靖公凡三

十七世按前漢地理志河東土地平易有鹽鐵之饒

本唐堯所居詩風唐魏之國也其民有先王遺教君

子深思小人險陋故唐詩蟋蟀山樞葛生之篇曰今
我不樂日月其邁宛其死矣他人是愉百歲之後歸
于其居皆思奢儉之中念死生之慮吳札聞唐之歌
曰思深哉其有陶唐氏之遺民乎自唐叔十六世至
獻公滅魏以封大夫畢萬滅耿以封大夫趙夙及大
夫韓武子食采於韓原晉於是始大至於文公霸諸
侯尊周室始有河內之土吳札聞魏之歌曰美哉泚
泚乎以德輔此則明主也文公後十六世為韓魏趙

所滅序傳曰武王既崩叔虞邑唐君子譏名卒滅武公驪姬之愛亂者五世重耳不得意乃能成霸六卿

專權晉國以耗

晉世家太火公曰晉文公古所謂明君也亡居外十九年至困約及即位

而行賞尚忘介子推况驕主乎靈公既弑其後成景致嚴至厲大刻大夫懼誅禍作悼公以後日衰六卿專權故君道之御其臣下固不易哉

周烈王七年馬陵

解題曰史記正義曰此馬陵在魏州元城縣東南或云在鄭州中牟

中山築長城

解題曰以備趙也

懷

解題曰史記正義曰括地志云故懷城在懷州武陟縣西

周顯王元年齊伐魏取觀津趙人歸齊長城

解題曰年表書趙侵齊取長城按田敬仲世家封即墨大夫烹阿大夫後書遂起兵西擊趙衛魏惠王請

獻觀津以和解

史記正義曰括地志云觀津在冀州棗陽縣東南本趙邑今屬魏

趙

人歸我長城於是齊國震懼人人不敢飾非務盡其

誠諸侯聞之莫敢致兵於齊然則趙侵齊取長城必

在封即墨大夫烹阿大夫前至是畏齊彊而歸之也

年表誤矣

齊世家書惠王獻觀之由曰敗魏於濁澤而閔惠王惠王請獻觀以和解魏世家載

韓趙敗魏於濁澤事甚詳齊威王未嘗與也

趙與韓來攻

解題曰按趙世家成侯七年與韓攻周蓋將分周為

二也

韓城邢丘

解題曰按水經注梁惠成王三年鄭城邢丘韓都鄭
故戰國策諸書多稱韓為鄭 邢丘故邢國今屬邢
州

周顯王二年趙與韓分周為二

解題曰初西周惠公封少子以奉王

東周惠公

雖獨擅河

南之地然禮樂征伐之大者王猶與聞也至是趙與

韓攻周分而為二則東西周各為列國不復相關顯
王雖在東周特建空名於其上耳自是而後凡史傳
所載致伯賜胙之類周王也征伐謀策稱東西周君
者皆謂二周君也趙韓攻周具興師之繇雖不可攷
意者為西周而舉歟周本紀云王赧時東西周分治
非也赧王特徙都西周耳當以趙世家為正

河水赤于龍門三日

解題曰按水經注竹書紀年晉昭公元年河赤于龍

門三里梁惠成王四年河水赤于龍門三日

周顯王三年魏侯與韓懿侯會于宅陽遂伐秦城武堵
秦敗之於洛陰

解題曰魏侯魏惠王也是時未稱王按魏世家惠王

五年與韓會宅陽

史記正義曰括地志云一名北宅在鄭州滎陽縣東南

城武

堵為秦所敗徐廣曰秦年表曰敗韓魏洛陰今本作
洛陽

趙與齊會阿下

解題曰趙世家成侯九年與齊戰阿下徐廣曰戰一作會按田敬仲世家威王封即墨大夫烹阿大夫之後諸侯莫敢致兵於齊二十餘年雖未可盡信然距阿下之會纔五十年耳當從別本

史記正義曰阿下即東阿也

魏公子景賈伐韓與韓將韓明戰於陽魏師敗走

解題曰按水經注竹書紀年梁惠成王五年公子景賈率師伐鄭韓明戰于陽我師敗逋

周顯王四年靈臺

解題曰徐廣曰一作儀臺

史記正義曰郭象曰儀臺靈臺也

周顯王五年秦章蟜伐魏

解題曰獻公之遣章蟜伐魏意在於復河西之地也

自是秦之勢浸強矣左氏紀諸侯侵伐雖大戰猶未

嘗書斬首幾萬也以萬計級自石門之戰始

史記正義曰括

地志云堯門山俗名石門在雍州三原縣西北秦紀上有路其狀若門故老云堯鑿山為門因名之

書天子賀以黼黻蓋賜之命而錫以冕服也侯伯冕

服七章六曰黼七曰黻皆在裳秦不用禮故史官不

知其為賜命耳楚世家曰周天子賀秦獻公秦始復
強而三晉益大魏惠王齊威王尤彊

周顯王六年魏伐趙取列人及肥

解題曰按水經注竹書紀年云梁惠成王八年惠成
王伐邯鄲取列人又云伐邯鄲取肥列人與肥並在
今洛州肥鄉縣

周顯王七年魏公叔痤敗韓師趙師于澮

解題曰按戰國策魏公叔痤與韓趙戰澮北禽樂祚

魏王說以賞田百萬祿之座辭曰夫使士卒不崩吳起餘教也脉形地之險阻使三軍不惑者巴寧爨襄之力也臣何力之有王曰善於是索吳起之後賜之田二十萬巴寧爨襄田各十萬王曰公叔豈非長者哉既為寡人勝強敵矣又不遺賢者之後不掩能士之迹復益田四十萬為百四十萬括蒼鮑氏彪曰說文澮水出霍山西南入汾樂祚趙將也

韓大雨三月

解題曰失其時

秦庶長國伐魏獲其將公孫痤

解題曰古史曰史記秦本紀及魏世家云虜公孫痤
耳惟趙世家及秦魏韓年表皆云虜太子痤按孟子
梁惠王言東敗於齊長子死焉西喪地於秦七百里
蓋太子申戰沒於齊而未嘗為虜於秦也凡史記言
是年秦虜太子痤者皆非前漢地理志左馮翊夏陽
縣故少梁秦惠王十一年更名禹貢梁山在西北龍

門山在北故韓國也今同州韓城縣

趙成侯與韓懿侯遇于上黨

解題曰即春秋所謂遇也上黨今潞州趙成侯十三年乃韓懿侯九年趙世家誤書為昭侯

秦獻公薨子孝公立

解題曰秦本紀書獻公二十四年薨今從年表通鑑孝公生二十一年矣

魏與趙戰于榆次陽邑

解題曰按水經注竹書紀年梁惠成王九年與邯鄲
榆次陽邑榆次今太原府榆次縣陽邑今太原府太
谷縣

魏侯會韓懿侯于巫沙

解題曰按水經注竹書紀年梁惠成王九年王會鄭
釐侯于巫沙在滎陽東今屬鄭州

大事記解題卷二

欽定四庫全書

大事記解題卷三

宋 呂祖謙 撰

周顯王八年公孫痤卒

解題曰痤去年為秦所獲尋歸之而終於相位也今年衛鞅以痤將死薦之魏惠王不能用故自魏適秦則痤之死必在今年

皮牢

解題曰史記正義曰括地志云澮水縣在絳州翼城

縣東南皮牢當在澮之側

秦孝公下令

解題曰是時河山以東

劉伯莊音義曰河謂龍門西河山謂華山彊國六

淮泗之間小國十餘

所謂泗上十二諸侯也

楚魏與秦接界魏

築長城自鄭濱洛以北有上郡楚自漢中南有巴黔

中

正義曰楚北及魏西與秦相接北楚自梁州漢中郡南有巴渝過江南有黔中巫郡也魏西界與秦

相接南自華州鄭縣西北過渭水濱洛水東岸向北有上郡鄜州之地皆築長城以界秦境洛即漆沮水

也

周室微諸侯力政爭相併秦僻在雍州不與中國

之會盟夷翟遇之孝公於是布惠振孤寡招戰士明
功賞下令國中求賢者將修繆公之業東復侵地公
孫鞅聞是令下乃西入秦因嬖臣景監

正義曰以求
闡人也

見按商君傳鞅初見孝公語事良久孝公時時睡弗
聽後五日復求見猶未中旨三見孝公善之而未用
衛鞅復見公與語不自知其鄰之前於席也語數日
不厭景監曰子何以中吾君吾君之驩甚也鞅曰吾
說君以帝王之道比三代而君曰久遠吾不能待故

吾以彊國之術說君君大說之耳其間雖有辯士增飾之辭然戰國之時指以為帝王之道者類皆迂濶而難行者也知王道之近且易者惟孟子一人而已秦伐魏圍陝城

解題曰按本紀孝公既下令於是乃出兵東圍陝城西斬戎之獮王獮戎邑也地理志天水有獮道縣周顯王九年致文武胙

解題曰祭文武歸其胙異姓諸侯之殊禮也襄王使

宰孔賜齊侯胙曰天子有事於文武使孔賜伯舅胙
周顯王十年公孫鞅變法

解題曰法始於伏羲而備於周雖其間有畧有詳要
之皆本於伏羲也法變於秦而極於五代雖其間有
革有因要之不能大異於秦也學者苟以伏羲神農
黃帝堯舜禹湯文武周公之法與商鞅變法之令並

觀之

商鞅傳變法之令已載於通鑑本傳云不告姦
者腰斬告姦者與斬敵首同賞匿姦者與降敵

同罰通鑑削不告姦者腰斬一句而以匿姦之罪為
不告姦之罪本傳又云民有二男以上不分異者倍

其賦通鑑皆削之本傳又云名田宅臣妾衣服以家
次通鑑削以家次三字皆當以本傳為正家次如漢
賜夏民嬰北

大畧可睹矣

商子來氏篇曰秦地方千里者五而穀土不能處三

此人不稱土也秦之所隣者三晉也彼土狹而民衆
其它畧居而井處土不足以生其民而民不西者秦
民務苦而復畧重也今諸侯之士來歸者利其田宅
而復之三世無知軍事即山東之民無不西者矣以
故秦事敵而使新民作本兵雖百宿於外境內不失
頃畝之時此富強而成之效也鞅富強耕戰之術畧
見於此杜氏通典曰商鞅誘三晉人利其田宅無知
兵事而務本於內任其所耕不限多少而使秦人應
外餘並見通鑑

秦置法官

解題曰按商子定分篇為法令置官有遷徙物故使吏民學讀法令知法令所謂者為之有敢剋定法令損益一字以上罪死不赦諸官吏及民有問法令者於主法令之官各以其所欲問之法官明告之各為尺六寸之符以左券予吏之問法令者主法令之官謹藏其右券木押以室藏之封以法令之長印即後有物故以券書從事法令皆副置一副天子之殿中天子置三法官殿中置一法官御史置一法官丞相

置一法官諸侯郡縣皆各為置一法官故天下之民無不知法者方孝公之時未為天子亦未置丞相蓋秦人以秦法補之然法官之置出於鞅則無疑也

魏龍賈帥師築長城于西邊

解題曰按水經注濟瀆又東逕陽武縣故城北又東絕長城竹書紀年梁惠成王十二年龍賈帥師築長城于西邊郡國志曰長城自卷逕陽武到密者是矣今屬開封府陽武縣

楚伐魏決白馬之口

解題曰按水經注河水舊在白馬縣南

本衛國曹邑今滑州白馬

縣縣決通濮濟黃溝故蘇代說燕曰決白馬之口魏無

黃濟陽

張儀曰決白馬之口以流魏氏

竹書紀年梁惠成王十二年

楚師出河水以水長垣之外者也金堤既建故渠水斷

考大時河決酸棗東潰金堤在東郡白馬界

尚謂之白馬潰長垣今開封

府長垣縣

周顯王十一年西山

解題曰史記正義曰括地志云在岐州陳倉縣西北
趙成侯與魏侯遇于葛孽

解題曰魏侯魏惠王也時未稱王徐廣曰葛孽在馬

丘

史記正義云括地志云葛孽
二城名在魏州魏縣西南

齊以鄒忌為相

解題曰按世家駙忌子以鼓琴見威王威王說而舍
之右室須臾鼓琴駙忌子推戶入曰善哉鼓琴王勃
然不說去琴按劍曰夫子見容未察何以知其善也

騶忌子曰夫大弦濁以春溫者君也小弦廉折以清者相也攫之深醲之愉者政令也鈎諧以鳴大小相益回邪而不相害者四時也吾是以知其善也見三月而受相印年表書於是年戰國策曰鄒忌修八尺有餘而形貌昞麗朝服衣冠窺鏡謂其妻曰我孰與城北徐公美其妻曰君美甚徐公何能及君也城北徐公齊國之美麗者也忌不自信而復問其妾妾曰徐公何能及君也旦日客從外來與坐談問之吾與

徐公孰美客曰徐公不若君之美也明日徐公來熟視之自以為不如窺鏡而自視又弗如遠甚暮寢而思之曰吾妻之美我者私我也妾之美我者畏我也客之美我者欲有求於我也於是入朝見威王曰臣誠知不如徐公美臣之妻私臣臣之妾畏臣臣之客欲有求於臣皆以美於徐公今齊地方千里百二十城宮婦左右莫不私王朝廷之臣莫不畏王四境之內莫不有求於王繇此觀之王之蔽甚矣王曰善乃

下令求諫

秦太子犯法

解題曰事見通鑑去年

魏侯及韓昭侯盟于巫沙

解題曰魏侯魏惠王也時未稱王按水經注竹書紀年魏惠成王十三年王及鄭釐侯盟于巫沙鄭即韓也

韓使許息以枳道易鹿於魏

解題曰按水經注黎陽縣河東岸有故城城內有故臺謂之鹿鳴臺又謂之鹿鳴城竹書紀年梁惠成王十三年鄭釐侯使許息來致地平丘戶牖首垣諸邑及鄭馳地我取枳道與鄭鹿所謂鹿即此城也

周顯王十二年黃池

解題曰吳王夫差晉定公所會盟之地也後漢地理志黃池在陳留平丘縣南今屬開封府平丘縣南

趙成侯朝齊

解題曰年表書趙孟如齊此當時國人所記而年表襲用其語也趙自烈侯篡晉受封至成侯四世矣國人記事尚仍前日大夫之稱文武之澤在人者深矣威烈王之命三晉其可罪也哉

齊封鄒忌為成侯

解題曰諸侯擅封同姓見於書傳者自晉昭侯封成師始諸侯擅封異姓見於書傳者自齊威王封鄒忌始

楚尹黑迎女于秦

解題曰楚與秦自春秋以來為甥舅之國尹黑則其使也

周顯王十二年韓昭侯魯共公衛成侯朝魏

解題曰是時魏惠王方強諸侯相率而朝之也索隱

曰按紀年魯恭侯宋桓侯

以年考之即宋公別成也

衛成侯鄭釐

侯來朝鄭釐侯者韓昭侯也

魏年表亦書魯衛宋鄭侯來朝

戰國策

載梁王觴諸侯於范臺酒酣請魯君舉觴

古者於旅也語於是

道古即晉所謂杜舉也

魯君興避席擇言曰昔者帝女令儀狄

作酒而美進之禹禹飲而甘之遂䟽儀狄絕甘酒曰
後世必有以酒亡其國者齊桓公夜半不寐易牙乃
煎熬燔炙和調五味而進之桓公食之而飽至旦不
覺曰後世必有以味亡其國者晉文公得南之威三
日不聽朝遂推南之威而遠之曰後世必有以色亡
其國者楚王登強臺左江而右湖其樂忘死遂盟強
臺而弗登曰後世必有以高臺陂池亡其國者今主

君之尊

主君卿大夫之稱尚仍其前日之號也

儀狄之酒也主君之味

易牙之調也左白台而右閭須南威之美也前夾林而後蘭臺強臺之樂也兼此四者可無戒與梁王稱善相屬括蒼鮑氏曰即此年魯衛宋韓來朝之事也觀魯君之所稱說則周孔之澤深矣

趙成侯燕文公會于阿

解題曰趙年表阿作河

史記正義云括地志云故郢城一名依城又名西阿城在

瀛州高陽縣西北以徐兗二水並過其西又但經其北曲曰阿以齊有東阿故曰西阿

紀年書

邯鄲成侯會燕成侯于安邑所謂燕成侯者或者丈
公之初謚歟

秦以公孫鞅為左庶長

解題曰秦記凡廢立者官多稱庶長蓋輔相之尊爵
也按本紀孝公用鞅法百姓苦之居三年百姓便之
乃拜鞅為左庶長所謂百姓便之者鞅之法使貧弱
者失職豪滑者固便之也法之始行豪滑未能遽興
功利僕妾服用皆就損抑蓋亦苦之及其久也能攻

金史卷之八
卷三
戰者得志焉能告訐者得志焉損下益上者得志焉
踴躍稱嘆合為一辭宜孝公以為百姓果便之而尊
其位重其任也彼貧弱者日以失職餘息奄奄怨氣
滿腹而不敢吐孝公安得而知之哉

周顯王十四年齊侯魏侯

解題曰齊侯威王也魏侯惠王也時皆未稱王

趙作檀臺

解題曰按世家魏獻榮椽因為檀臺榮椽或以為

地名索隱謂榮椽是良材可為椽斷飾有光榮故趙

因用之以為檀臺其說是也

左傳宋伐鄭以太宮之椽歸為盧門之椽亦其

比當是時秦孝公厲志修政求復河西之地而魏惠

王乃溺心淫侈恬不為備方以寶珠驕齊又以榮椽

夸趙其威國也宜哉

秦孝公魏侯會于杜平

解題曰魏書本爵而秦書僭稱者魏是時未稱王秦

之僭稱公自春秋以來非一日矣孝公明年為元里

之役今年尚為好會其商君之謀與

史記正義云杜平在同州澄城

界縣

楚以昭奚恤為相

解題曰失其年戰國策載明年景舍請救趙已與昭

奚恤爭論今附見此年之末楚宣王問羣臣曰吾聞

北方之畏昭奚恤也果誠何如江乙設狐虎之說又

挾魏以譖之則昭奚恤為敵國所畏可知矣乙之言

曰下比周則上危下分爭則上安此數術家之論也

夫下比周則上固危矣苟下皆分爭如齊之田闕唐之牛李上亦豈能安乎

趙伐衛取漆城之

解題曰按水經注濮渠之側有漆城竹書紀年梁惠成王十六年邯鄲伐魏取漆城之今屬濮州

周顯王十五年秦取少梁

解題曰此秦孝公復河西地之始也

齊田忌衛公孫倉圍魏襄陵以救趙

解題曰按水經注竹書紀年梁惠成王十七年衛公孫倉會齊師圍我襄陵襄陵故宋之承匡襄牛之地宋襄公之所築故曰襄陵

宋伐趙圍一城

解題曰梁惠王伐邯鄲徵師於宋宋請於趙曰敝邑不從則恐危社稷請受邊城徐其攻而留其日以待下吏之有城而已趙許之宋人因遂舉兵入趙境而圍一城焉

周顯王十六年魏拔趙邯鄲服十二諸侯遂稱王齊敗
魏亦稱王

解題曰邯鄲趙國都也為魏所拔或者是時暫徙都
與十二諸侯者當時所謂泗上十二諸侯蓋宋魯滕
薛諸小國在淮泗之上者也按戰國策史記魏惠王
圍邯鄲趙求救於齊齊威王召大臣而謀駟忌子曰
不如勿救段干朋曰魏氏并邯鄲其於齊何利哉不
如南攻襄陵以敝魏邯鄲拔而乘魏之敝威王從其

計使田忌為將孫臏為師南攻襄陵趙又求救於楚
昭奚恤謂楚王曰不如無救景舍曰不如少出兵以
為趙援趙恃楚勁必與魏戰魏怒於趙之勁而見楚
救之不足畏也必不釋趙趙魏相敝則魏可破也楚
因使景舍救趙是歲魏惠王既拔邯鄲從十二諸侯
朝天子以西謀秦孝公遣衛鞅見魏王曰大王之功
大矣令行於天下矣今大王之所從十二諸侯非宋
衛則鄒魯不足以王天下不若先行王服然後圖齊

楚魏王說遂廣公宮建几旂用天子之制齊楚皆怒

戰國策又曰魏伐邯鄲因退為逢澤之遇乘夏車稱
夏王天下皆從齊聞之舉兵伐魏壞地兩分又曰梁
君伐楚勝齊制韓趙之兵驅十二諸侯以朝天子於
孟津此兩說與上所載商鞅事頗不同辯士之說雖
不可盡信但魏自拔邯鄲
之後稱王則無可疑也齊田忌孫臏乘魏之敝自

襄陵擊魏大敗之桂陵

孫臏傳所載小差當從田敬
仲世家桂陵史記正義云在

曹州東
縣東北於是齊最強於諸侯自稱為王以令天下楚

景舍亦取睢濊之間餘見通鑑

後漢志梁國睢陽注
梁國有濊陽南臨濊

水按水經注竹書紀年惠成王十八年惠成王以韓
師諸侯師于襄陵齊侯使楚景舍來求成當是時齊

楚大勝魏大敗豈有齊楚反
求成之理蓋魏火曲筆也

韓伐東周取陵觀邢丘

解題曰東周者顯王之所居也邢丘年表作廩丘

周顯王十七年大良造

解題曰按前漢書商君為法於秦戰斬一首賜級一

爵一級欲為官者五十石其爵名一為公士師古曰言有爵

命異於上卒故稱公上也劉昭曰步卒之有爵為上官也二上造師古曰造成也言有成命於上

也三簪裒師古曰以組帶馬曰裒簪裒者言飾此馬也裒月了反四不更師古曰言

不豫更卒之事也

五大夫

師古曰列位從大夫

六官大夫

師古曰加官公者示猶尊

也通典曰亦為之國大夫

七公大夫

與上同

八公乘

師古曰言其得秉公家之車也

劉昭曰自吏民爵不得過公乘過者得貫與子若同產然則公乘者軍吏之爵最尊者

九五大

夫

師古曰大夫之尊也劉昭曰自公士至五大夫皆軍吏也

十左庶長十一右庶

長

師古曰庶長言為衆列之長也

十二左更十三中更十四右更

師古

曰更言主領更卒部其役使也

十五少上造十六大上造

師古曰言皆主上造

之上也

十七駟車庶長

師古曰言乘駟馬之車而為衆長也

十八大庶長

師古曰又長尊也劉昭曰自左庶長以上至大庶長皆將軍也所將庶人更卒故以為大庶長即大將軍

也左右庶長即左右偏裨也

十九關內侯

師古曰言有侯號而居京畿無國邑也通典曰

荀綽百官表注云時六國未平將帥皆家關中故以爲號劉昭曰關內侯無土寄食在郡縣民租多少各

有戶數爲限如淳曰列侯出關就國侯但爵其身有家累者與之關內之邑食其租稅又有倫侯建成侯

趙亥昌武侯馮毋擇是也但有封名而無食邑

二十徹侯

師古曰言其爵位上通於天子通典

曰後漢志曰徹侯金印紫綬功大者食縣小者食鄉亭得以其所食吏民後避漢武帝諱改曰通侯或曰

列侯所謂大良造即大上造也秦記載用事者不過曰

左右庶長然則左更以上皆商君之所增與本紀年

表皆書鞅伐魏安邑降之安邑魏都也按魏世家惠

王三十一年始自安邑遷都大梁通鑑刪之當矣

諸侯圍衛襄陵

解題曰皇極經世載衛鞅會韓趙之師圍魏襄陵當攷
魏築長城塞固陽

解題曰以備秦及西戎也史記正義曰魏築長城自
鄭濱洛北庭銀州至勝州固陽縣為塞固陽有連山
東西黃河西南至夏會等州

周顯王十八年韓以申不害為相

解題曰申不害者荆人也故鄭之賤臣學本於老子而主刑名以術干韓昭侯魏之圍邯鄲也昭侯問申不害曰吾誰與而可申不害始合於昭侯然未知昭侯之所欲也恐言而未必中也對曰此安危之要國家之大事也臣請深惟而苦思之乃微請趙卓韓臯曰子皆國之辯士也夫為人臣者言豈能必用盡忠而已矣二人各進議於昭侯不害微視昭侯之所說以言於昭侯昭侯大說之至是遂以為相餘見通鑑

魏歸趙邯鄲

解題曰皇極經世書趙伐魏歸趙邯鄲當攷

周顯王十九年秦徙都咸陽

解題曰商君築冀闕宮庭於咸陽秦自櫟陽徙都之

商君語趙良治秦之功曰大築冀闕宮如魯衛則秦

昔未有此制至是始築之也

索隱曰冀闕即魏闕也
冀記也記列教令於此

門咸陽在今為京兆府咸陽縣秦故城在縣東十五

里

漢高帝元年更名新城七年罷屬長安武帝元鼎
三年別為渭城縣屬右扶風後漢省之唐武德元

年析涇陽始平置咸陽縣屬京兆府索隱曰關中記云孝公都咸陽今渭城是也在渭北始皇都咸陽今城南大城是也名咸陽者山南曰陽水北亦曰陽其地在渭水之北又在九峻諸山之南故曰咸陽也

秦壞井田開阡陌

解題曰阡陌田間之道也南北曰阡東西曰陌商君變法至是十年矣始能壞井田開阡陌蔡澤稱商君之功亦曰決裂阡陌決裂云者唐虞三代井田之制分畫堅明封表深固非大用力以決裂之不能遽掃滅其迹也毀之之難如此則成之豈一朝一夕之積哉商

君必欲變井田為阡陌者其意果安在歟井田之制六

尺為步步百為畝畝百為夫一夫之地環之以遂

一畝之間

廣八尺深八尺曰畎百畝之間廣二尺深二尺曰遂皆小溝也

遂上有徑九夫為井一井

之地環之以溝

廣四尺深四尺

溝上有畛自溝而為洫自洫而

為澮自澮而為川經緯錯綜若畫碁局雖有强者百畝

之外不容兼併也雖有弱者百畝之內不至侵奪也強

弱愚智各得其所天生民而立之君凡以為此商鞅不

知代天理物之意徒欲鼓舞姦滑以利吾國故除溝洫

之限立賣買之法工於耕戰金多貨厚者雖兼十夫百夫千夫之地曾莫之禁彼愚弱之民不能趨事赴功以利吾國雖殍死中野於我何加損哉其設心如是特盜賊之長雄耳非可與論君道也班固有言曰秦孝公用商君壞井田開阡陌急耕戰之賞傾隣國而雄諸侯然王制遂滅僭差亡度庶人之富者累鉅萬而貧者食糟糠有國强者兼州域而弱者喪社稷蓋得之矣

秦弛虞衡之禁

解題曰古者虞衡皆有厲禁其詳見於周官所以公
天施而育庶物也至商鞅始撤之按前漢食貨志董
仲舒曰秦用商鞅之法改帝王之制除井田民得賣
買富者田連阡陌貧者亡立錫之地又顓川澤之利
管山林之饒荒淫越制踰侈以相高邑有人君之尊
里有公侯之富然則弛虞衡之禁與除井田蓋同時
也

秦令民父子兄弟同室內息者為禁

解題曰內者納也息者子也子弟納妻而生子則不許同居也商君之初下令民有二男以上不分異者倍其賦及是雖止有一男納妻生子亦不容不分異矣商君謂趙良曰始秦戎翟之教父子無別同室而居今我更制其教而為其男女之別先王之禮不下於庶人繇命士以上父子始異宮今商君制禮乃過於先王抑不知果其情歟

秦聚小都鄉邑為三十一縣置令丞

解題曰此廢都邑為郡縣之始也前漢百官表曰縣令長皆秦官萬戶以上為令秩千石至六百石減萬戶為長秩五百石至三百石皆有丞尉

周顯王二十年秦初置有秩史

解題曰商鞅既廢井田比閭隣里之制亦壞故置有秩史以董之也按前漢百官表縣令長丞尉是為長吏丞尉秩微者止於二百石百石以下有斗食佐史之秩是為少

吏大率十里一亭亭有長漢官儀曰十里一亭亭長亭候五里一郵郵間相去

二里半司各盜亭長持二尺板以勅賊索繩以收執賊風俗通曰漢家因秦大率十里一亭亭留也蓋行

旅宿會之所館

十亭一鄉鄉有三老

三老在有秩上者以德齒表率其鄉非吏也

有秩

後漢志云有秩郡所署秩百石掌一鄉人漢官儀曰鄉戶五千則置有秩風俗通曰秩則田間

大夫言其官裁有秩耳

嗇夫

後漢志云其鄉小者縣置嗇夫一人謂鄉戶不滿五千則不置有秩

如一縣有數鄉鄉小不置有秩則縣置嗇夫一人以總治之也

游徼三老掌教化

後漢

志云三老掌教化凡有孝子順孫貞女義婦讓財救患及學事為民法式者皆扁表其門以興善行

嗇

夫職聽訟收賦稅

後漢志云有秩嗇夫皆主知民善惡為役先後知民貧富為賦多少

乎其差品前漢百官表不言有秩所掌蓋與嗇夫所主之職同總言之也游徼徼循禁賊

盜

後漢志云又有鄉佐屬鄉主民收賦稅

縣大率方百里其民稠則減

稀則曠鄉亭亦如之皆秦制也又按後漢志里有里魁民有什五善惡以告里魁掌一里百家什主十家五主五家以相簡察雖不載所起觀商鞅初令令民為什五而相收司則始於鞅明矣鄉官者政事之所基也鞅既剋滅三代之制猶置三老掌教化何邪蓋初變古者必有餘澤遺韻間見層出於汙法暴政之中至於再變三變則遂蕩然矣

周顯王二十一年秦初為賦

解題曰譙周曰為軍賦徐廣曰制貢賦之法也

秦平斗桶權衡丈尺行之

解題曰變周制也鄭玄曰桶音勇今之斛也

周顯王二十三年魯康公薨子景公偃立

解題曰康公薨年從世家景公名從年表

衛更貶號曰侯

解題曰衛本侯爵自春秋以來例僭稱公至是以其

國日削自貶其號復稱其本爵也

周顯王二十五年秦會諸侯于京師

解題曰孝公求霸而為尊周之名也觀逢澤之會使
公子少官會諸侯朝天子則今年之會意者孝公亦
不親往歟

高唐

解題曰史記正義曰括地志云博州縣也

齊田忌出奔

解題曰駙忌與田忌不善公孫開又謂成侯忌曰公何不令人操十金卜於市曰我田忌之人也吾三戰而三勝聲威天下欲為大事亦吉乎不吉乎卜者出因令人捕為人卜者驗其辭於王之所田忌聞之因遂率其徒襲攻臨淄求成侯不勝而犇成侯齊之名相也執之相軋遂至於此

周顯王二十六年魏以中山君為相

解題曰中山是時服屬於魏若諸侯入仕於王國也

首垣

解題曰史記正義曰在河北

齊威王薨子宣王辟疆立

解題曰通鑑載威王四十六年乃卒宣王元年當顯
王之三十七年當攷

周顯王二十七年諸侯西賀秦

解題曰以去年天子致伯而賀也

秦會諸侯於逢澤以朝王

解題曰戰國策載魏惠王伐邯鄲因退為逢澤之遇
天下皆從按魏克邯鄲即為齊楚所襲天下未嘗皆

從也今從史記徐廣曰開封東北有逢澤

史記正義
曰括地志

云逢澤亦名逢池在
汴州浚儀縣東南

周顯王二十八年魏龐涓伐韓齊田忌孫臏伐魏以救
韓

解題曰田忌前三年出奔至是復將宣王召而復之
也魏世家魏伐趙齊救趙擊魏此乃往歲桂陵之戰

是時田忌孫臏亦為將而桂陵馬陵地名相近易於
混殺故誤記耳今從孫臏傳年表書田忌田嬰田盼
為將孫子為師嬰盼蓋忌之佐貳也戰國策載魏客
之言曰太子年少不習於兵田盼宿將也而孫子善
用兵戰必不勝不勝必禽舉盼而不數忌豈聲稱素
出其右歟徐廣曰馬陵在元城

史記正義曰虞喜志
林云馬陵在濮州鄆

城縣有陵間谷可以置伏按龐
涓敗即此也徐廣云元城非是

魏城濟陽

解題曰水經注竹書紀年梁惠成王三十年城濟陽

風俗傳曰縣故宋地也應劭曰今陳濟陽縣是也

周顯王二十九年秦公孫鞅襲虜魏將公子卬魏獻河西之地於秦以和

解題曰秦圖河西之地久矣至是因魏馬陵之敗始

用師而得之也

史記正義曰謂同華等州

按魏世家秦趙齊共伐

我秦將商君詐我將軍公子卬而襲奪其軍破之

魏徙都大梁

解題曰安邑與秦界河既獻河西地則迫秦不可都

故徙都大梁

商君傳曰魏居嶺阨之西獨擅山東之利魏不支秦必東徙索隱曰嶺阨蓋即

安邑之東山嶺險阨之地即今蒲州之中條以東連汾晉之嶮嶺也正義曰大梁汴州浚儀縣今開封府

祥符縣

汲冢紀年曰梁惠成王九年四月甲寅徙都大

梁所謂惠成王即惠王也年與史記所載不同當考

秦封公孫鞅為列侯

解題曰賞虜公子卬取河西地之功也楚世家書秦

封衛鞅於商南侵楚蓋商與楚接境鞅之封邑南侵

楚地耳

左傳哀公四年楚告晉曰將通於少習以聽命杜預注少習商縣武關也武關屬秦觀此

則商與楚相接可知

正義曰商洛縣在商州東八十九里本周

之商國於林在鄧州內鄉縣東七里古於邑也

楚滅邾

解題曰按杜氏釋例邾曹姓顓頊之後有陸終氏產

六子其第五子曰晏安邾蓋晏安之後也周武王封

其苗裔邾挾為附庸居邾今魯國鄒縣是也自挾至

儀父十二世始見春秋齊桓公霸進爵稱子文公徙

于繹桓公以下春秋後八世而楚滅之前漢地理志

駒縣故邾國

今兗州駒縣

二十九君為楚所滅水經注楚

宣王滅邾今附於宣王之末年

水經注又曰江水東逕邾縣故城南邾滅

徙居於此故曰邾在黃州黃岡縣東南一百二十里

周顯王三十年楚聘莊周為相

解題曰周蒙人

蒙縣屬梁國

嘗為蒙漆園吏與梁惠王齊

宣王同時其學無所不窺然其要本歸於老子之言

楚威王使使厚幣迎之許以為相莊周笑謂楚使者

曰千金重利卿相尊位也子獨不見郊祭之犧牛乎
養食之數歲衣以大繡以入太廟當是之時雖欲為
孤豚豈可得乎子亟去無污我我寧游戲污瀆之中
自快無為有國者所羈終身不仕以快吾志焉史失
其年今載於威王元年

周顯王三十一年岸門

解題曰年表去年書與晉戰岸門本紀今年書與晉
戰鴈門按索隱紀年云與魏戰岸門下又云敗韓岸

門蓋其地也此云鴈門恐聲誤秦與韓魏戰不當遠

至鴈門也

秦敗韓岸門在報王元年

以此考之年當從本紀地名

當從年表

史記正義曰括地志云岸門在許州長社縣西

秦孝公薨子惠王立

解題曰本紀書惠文君立是時未稱王也戰國策止稱惠王蓋畧舉其謚如衛公叔文子本謚貞惠文子而後人但稱文也

大荔園秦合陽

解題曰因秦之喪也大荔西戎之別也

秦公孫鞅車裂

解題曰按戰國策史記惠王蒞政有頃商君告歸公
子虔之徒告商君欲反發吏捕商君商君亡至關下
欲舍客舍客舍人不知其是商君也曰商君之法舍
人無驗者坐之商君喟然嘆曰嗟乎為法之敝一至
此哉惠王車裂之秦人不憐餘見通鑑澠池在今河

南府澠池縣

水經注云穀水出于峭東馬頭山穀陽
谷東北流歷澠池川漢景帝三年初徙

萬戶因峭澗之池以目縣焉亦或謂之彭池穀水又東逕秦趙二城南即趙王鼓瑟秦王擊缶處世謂之俱利城穀水又東逕上峭所水謂三峭也穀水又東左會北溪溪水北出澗池山東南流注于穀疑卽孔安國所謂澗水也穀水又東逕新安縣故城南北夾流而西接峭澗城又東逕于雍谷溪曰岫縈紆石路阻峽故亦有峽石之稱

太史公曰商君其天資刻薄人也跡其

欲干孝公以帝王術挾持浮說非其質矣且所因繇

嬖臣及得用刑公子虔欺魏將卬不師趙良之言亦

足發明商君之少恩矣余嘗讀商君開塞耕戰書與

其人行事相類卒受惡名於秦有以也夫

按商子開塞篇曰刑

不能去奸而賞不能止過者必亂故王者刑用於將
過則大邪不生賞施於告奸則細故不失治民能使
大邪不生細故不失則國法國法必強立君之道莫
廣於勝法勝法之務莫急於去奸去奸之本莫深於
嚴刑故王者藉刑以去刑農戰篇曰凡人主之所以
勸民者官爵也國之所以興者農戰也今民求官爵
皆不以農戰而以巧言虛道者其國必削國去言則
民樸民樸則不淫民見上利之從一空出也則作壹
作壹則多力多力則國強今境內之民皆曰農戰可
避而官爵可得也是故豪傑皆可變業務學詩書事
高賈為技藝皆以避農戰故詩書禮樂善修仁廉辨
惠國有十者上無使守戰敵至必削不至必貧國去
此十者敵不敢至雖至必却此太
少公所謂與其人行事相類者也

蘇秦說秦連橫

解題曰連關中之謂橫合關東之謂從按戰國策史記蘇秦始將連橫說秦惠王時方誅商鞅疾辯士弗用資用乏絕去秦而歸乃夜發書陳箴數十得太公陰符之謀伏而誦之簡練以為揣摩讀書欲睡引錐自刺其股血流至足曰安有說人主不能出其金玉錦繡取卿相之尊者乎其用意如此

周顯王三十二年楚韓趙蜀朝秦

解題曰以惠王新立而朝之也

韓申不害卒

卷三

解題曰按列傳著書二篇號曰申子

劉向別錄曰今民間所有上下

二篇中書六篇皆合二篇已備過太史公所記

韓非子曰申不害徒術而無

法公孫鞅徒法而無術申不害韓昭侯之佐也韓者

晉之別國也晉之故法未息而韓之新法又生先君

之令未收而後君之令又下申不害不擅其法不一

其憲令雖使昭侯用術而羣臣猶有所譎其辭矣故

託萬乘之勁韓十七年而不至於霸王者雖用術於

上法不勤飾於官之患也公孫鞅之治秦也設告相
坐而責其實連什五而同其罪賞厚而信罰重而必
是以其民用力勞而不休逐敵危而不却故其國富
而兵强然而無術以知姦及孝公商君死惠王即位
秦法未敗也而張儀以秦徇韓魏惠王死武王即位
甘茂以秦徇周武王死昭襄王即位穰侯越韓魏而
東攻齊五年而秦不益尺寸之地乃成其陶邑之封
應侯攻韓八年成其汝南之封自是以來諸用秦者

皆應穰之類也商君雖飾其法人臣反用其資故乘
強秦之資數十年而不至於帝王者主無術於上之
患也李奇謂申不害為術商鞅為法韓非兼行申商
之術觀非此論則奇之說信矣

周顯王三十三年天子使人賀秦

解題曰賀亦聘也

秦初行錢

解題曰秦前此未以錢為幣也

子孟軻見梁惠王問利國

解題曰太史公曰余讀孟子書至梁惠王問何以利
吾國未嘗不廢書而嘆也曰嗟乎利誠亂之始也夫
子罕言利者常防其原也故曰放於利而行多怨自
天子以至於庶人好利之弊何以異哉廣漢張氏栻
曰學者莫先於義利之辨蓋聖人之學無所為而然
也無所為而然者命之所以不已性之所以不偏而
教之所以無窮也自非卓然先審夫義利霄壤之判

慮思力行不舍晝夜其能真有得乎其事雖善而納交要譽與惡其聲之念或萌于中是亦利而已矣

齊宣王與魏惠王韓昭侯會平阿南

解題曰年表阿作河

史記正義曰平阿即沛郡平阿縣

按列傳田嬰

使於韓魏韓魏服於齊嬰與韓昭侯魏惠王會齊宣王東阿南盟而去即此會也

秦興師求九鼎

解題曰按戰國策秦興師臨周而求九鼎周君使顏

率說齊王曰秦為無道欲興兵臨周而求九鼎周之君臣內自計與秦不若歸之大國齊王大悅發師五萬人使陳臣思將以救周而秦兵罷齊將求九鼎以顏率解之而止剡川姚氏宏曰以春秋後語考之周君周顯王也齊王齊宣王也戰國策不載年今附見於宋太丘社亡之前

宋太丘社亡

解題曰古者立社植木以表之因謂其木為社故哀

公問社而宰我對以松柏栗莊周之櫟社潁川之長

社

水經注長葛社樹
暴長故曰長社

亦以其木名其社也所謂太丘

社亡者震風凌雨此社之樹摧隕散落不見蹤跡民

因以為亡與按封禪書宋太丘社亡而九鼎沒于泗

水彭城下

漢郊祀志周顯王之四十三年宋太
丘社亡與史記年表社亡之年不同東坡

蘇氏曰此周人毀鼎以緩禍而假之神妖以為說也

戰國之際秦與齊楚皆欲之周人莫知所適與得鼎

者未必能存周而不得者必碎之此九鼎之所以亡

也封禪書又曰秦滅周周之九鼎入於秦使陽果入秦則秦皇過彭城何為齎戒禱祠使千人沒泗水

求九鼎哉

周顯王三十四年秦君冠

解題曰是時未稱王也冠禮之尚存者也即漢所謂加元服也

秦拔韓宜陽

解題曰韓年表止書秦拔我宜陽按秦武王四年甘茂拔宜陽其役甚大其事甚詳然則今年拔宜陽特

暫得之耳

壽陵

解題曰古者不豫凶事其豫為之者則有之矣一則

以其年也

六十一歲制七十時制
八十月制九十日修

一則以其位也

君即位而

為擇歲
壹漆之

至於死而可制如絞衾冒則未嘗豫為之

也諸侯五月而葬以一國之力為陵墓有餘矣何必

豫哉壽陵之名見於書傳者蓋自此始墓之稱陵在

古無貴賤之別國語管仲曰昔者聖王之治天下也

參其國而伍其鄙定民之居成民之事陵為之終是
民之墓亦通稱陵也秦記載諸君之葬至惠丈王以
後始稱陵然則名王者之兆域為陵其出於戰國之
際乎

齊宣王與魏惠王會于甄

解題曰史記魏世家今年書惠王卒子襄王立襄王
十六年卒子哀王立按通鑑考異汲冢紀年篇惠王
三十六年改元從一年始至十六年而稱惠成王卒

卽惠王也疑史記誤分惠成之世以爲二王之年也

哀王特不稱謚謂之今王

汲冢書記事止於哀王之二十年哀王二十三年乃

卒故謂之今王

世本惠王生襄王而無哀王然則今王者魏

襄王也彼旣魏史所書魏事必得其真今從之

周顯王三十五年齊宣王魏惠王與諸侯會于徐州以

相王

解題曰齊魏之王以戰國策考之蓋在魏拔邯鄲之歲而秦本紀今年又書齊魏爲王未知孰是然戰國

策之所載似得其實蓋魏以邯鄲之勝齊以桂陵之
勝志得意滿各僭稱王容有此理若今歲則魏方衰
弱齊亦未有大功何為驟稱王乎然齊魏年表今年
書與諸侯會于徐州以相王者齊魏稱王其日已久
至是共會諸侯欲其皆稱王以同已之僭也但諸侯
未即從之耳秦紀所書或者齊魏前此特稱王於其
國至此其名號始通於諸侯乎

魏世家書哀王元年
與諸侯會徐州相王

也追尊父惠王為王按孟子
與惠王語皆稱王豈追尊乎

蘇秦說燕與趙合從

卷三

解題曰蘇秦去秦乃東之趙趙肅侯令其弟成為相

號奉陽君奉陽君弗說之去游燕歲餘而後得見說

燕文公曰燕有朝鮮

朝鮮箕子所封今高麗國

遼東北有林胡樓

煩

史記正義曰二胡國名在朔嵐之北

西有雲中九原

史記正義曰二郡並在勝州也

雲中郡城在林榆縣東北四十里九原郡在林榆縣西界

南有滹沱易水

史記正義曰滹

沱出代州繁峙縣易水出易州縣東流過幽州歸義縣東與滹沱合河也

車六百乘騎六

千尺南有碣石

史記正義曰山在平州燕東南

鴈門

史記正義曰山在代燕西門

之饒北有棗栗之利所以安樂無事者以趙之為蔽
其南也與趙從親則燕必無患矣文公資蘇秦車馬
金帛以說趙李兌為秦謂奉陽君曰齊燕離則趙重
齊燕合則趙輕今君合燕於齊非趙之利也臣竊為
君不取也奉陽君曰何吾合燕於齊對曰夫制燕者
蘇子也而燕弱國也東不如齊西不如趙豈能東無
齊而西無趙哉而君甚不善蘇秦蘇秦能抱弱燕而
孤於天下哉是驅燕而使合於齊也奉陽君曰善乃

使人與秦結交

蘇氏古史注李兌之言見戰國策然戰國策載蘇秦說趙亦云今奉陽君

捐館舍與史記同然奉陽君即公子成成事武靈王惠文王肅侯之世實未亡也且蘇秦死張儀說趙趙王言先王之時奉陽君蔽欺先王明其未死也今故載李兌之言而削奉陽君捐館之語也

楚威王大敗越師殺王無彊越自此散微

解題曰越姒姓夏后帝少康之子封於會稽以奉守

禹之祀後數十世至於允常與吳王闔廬戰而相怨

伐允常卒子句踐立句踐卒子王鼫與立

索隱曰紀年云句踐

卒鹿郢立六年卒

鼫與卒子王不壽立

索隱曰紀年云不壽立十年見殺朱句立

王不壽卒子王翁立

索隱曰紀年云二十七年宋句卒

王翁卒子王

翳立王翳卒子王之侯立王之侯卒子王無疆立

索隱

曰紀年云翳二十三年遷于吳三十六年七月太子諸咎弑其君翳十月越殺諸咎大夫寺區定越亂立初無餘之即王之侯也十二年寺區弟忠弑其君次無疆立無疆八年薨莊子曰越人三弑其君王子搜患之逃於丹穴不肯出越人薰之艾葉乘以王與樂資云號曰無疆蓋無疆後乃次無疆也

王無

疆時越興師北伐齊與中國爭疆齊威王使人說王

無疆曰願大王轉攻楚龐長沙楚之粟也竟陵澤楚

之材也越窺兵通無假之關此四邑者不上貢事於

楚矣

正義曰無假之關當在江南長沙之西北四邑
龐長沙竟陵澤也龐長沙出粟之地竟陵澤出

材木之地此邑近長沙潭衡之境若窺兵西通無假
之關則四邑不得北上貢於楚之郢都矣戰國時永
郴衡潭岳鄂江洪饒並先楚南境屬楚
也表吉虔撫鄒宣並越西境屬越也於是越遂釋

齊而伐楚楚威王大破越殺王無疆盡取吳故地至
浙江北而越以此散諸族子或為王或為君濱於江
南海上服朝於楚潁濱蘇氏曰吳以蠻夷爭盟上國
陵蔑齊晉結怨楚越再世而亡何者地遠而民勞執
不順也越王勾踐既克夫差雖號霸王而實斂兵自

守無大征伐分吳故土以畀楚宋魯遂以保國傳世
彼親見其害知所以自監矣哉至王無疆無閭廬之
知而有夫差之愚其殘國宜矣

周顯王三十六年楚威王伐齊大敗申縛於泗上

解題曰按戰國策史記魏惠王之為齊敗於馬陵也
告惠施曰寡人怨齊至死不忘欲悉起兵攻之何如
對曰王若欲報齊不如折節而朝齊楚王必怒矣王
游人而合其間則楚必伐齊惠王乃朝齊張丑謂齊

相田嬰曰今覆魏十萬之軍而禽其太子又臣萬乘之魏楚王好用兵而甚務名必為齊患田嬰不聽遂納惠王而與之並朝齊王再三楚王怒田嬰復欺楚

徐廣曰齊說越令攻楚故云齊欺楚

楚王自將兵伐齊與齊將申縛遇

於泗水之上大敗申縛圍徐州趙人至枝桑燕人至格道齊使陳毛聽罪於楚西說趙北說燕天下乃釋齊楚令齊逐田嬰嬰使張丑說楚王曰王所以勝者田盼子不用也盼子有功於國百姓為之用嬰子弗

善而用申縛故王勝之也今嬰子逐盼子必用矣楚

王因弗逐

以馬陵之役魏客之言及張丑說楚之辭觀之田盼為隣國所畏百姓所服如此而

聲績卒不大見於世戰國之時維名將是求盼獨不遇上下之交難矣哉

齊敗燕於權

解題曰按戰國策權之難

後漢志南郡編注間繆以權叛又當陽注縣東南有

權城齊燕交兵必非此地

齊燕戰秦使魏冉之趙

括蒼鮑氏曰冉傳言自惠王時

任事然則此役文公末年也

出兵助燕擊齊田嬰使魏處之趙謂

李向

向趙用事者也

曰君助燕擊齊齊必急急必以地和於

燕而身與趙戰矣然則是君自為燕求兵為燕取地

也故為君計者不如按兵勿出齊必緩緩必復與燕

戰戰而勝兵罷敝趙可以取唐曲逆

括蒼鮑氏曰並屬中山國言二

國戰不復北顧趙可以其間取中山也

戰而不勝命懸於趙矣燕再戰

趙弗救子噲

人公孫子噲

謂文公曰不如以地請合於齊

趙必救我若不吾救不得不事

括蒼鮑氏曰燕齊合則趙輕雖不救我後

必事我

文公曰善令郭任以地請講於齊趙聞之遂出

兵救燕今從鮑氏所編戰國策載於文公末年

蘇秦說趙肅侯六國合從

解題曰按史記戰國策蘇秦從燕之趙說趙肅侯曰
安民之本在於擇交擇交而得則民安擇交不得則
民終身不得安請言外患齊秦為兩敵而民不得安
倚秦攻齊而民不得安倚齊攻秦而民不得安故夫
謀人之主伐人之國常欲出辭斷絕人之交願無出
於口請屏左右曰史記改請屏左右曰五字作請別白黑非也當從戰國策言所
以異陰陽而已矣君誠能聽臣燕必致羶裘狗馬之

地齊必致海隅魚鹽之地楚必致橘柚雲夢之地韓魏皆可使致湯沐之邑貴戚父兄皆可以受封侯此臣之所以為君願也今君與秦則秦必弱韓魏與齊則齊必弱楚魏魏弱則割河外

是時河西地猶未盡入於秦

韓弱

則劾宜陽宜陽劾則上郡絕河外絕則道不通楚弱則無援秦欲已得乎山東則必舉兵而嚮趙矣此臣之所以為君患也當今之時山東之國莫強於趙趙地方數千里帶甲數十萬西有常山

正義曰在鎮州西

南有

河漳

正義曰
在潞州

東有清河

正義曰
今貝州

北有燕國秦之所害

於天下者莫如趙然而不敢伐趙者韓魏趙之南蔽

也韓魏不能支秦則禍中於趙矣竊為君計莫若約

天下之將相會于洹水之上通質割白馬而盟以擯

秦要約曰秦攻楚齊魏各出銳師以佐之韓絕其糧

道趙涉河漳燕守常山之北秦攻韓則楚絕其後齊

出銳師而佐之趙涉河漳燕守雲中秦攻齊則楚絕

其後韓守成臯魏塞其道趙涉河漳博關燕出銳師

以佐之秦攻燕則趙守常山楚軍武關齊涉渤海韓
魏皆出銳師以佐之秦攻趙則韓軍宜陽楚軍武關
魏軍河外齊涉清河燕出銳師以佐之諸侯有不如

約者以五國之兵共伐之趙肅侯乃飾車百乘遣蘇

秦約諸侯是時秦使公孫衍攻魏取雕陰

魏世家載襄王五年

秦取雕陰即惠王之後五年也以蘇秦傳攷之當從
年表史記正義云括地志云雕陰在廊州洛交縣北

且欲東兵蘇秦恐秦兵至趙而敗從約乃激怒張儀

入秦秦惠王以為客卿儀與秦俱學從橫術於鬼谷

先生者也於是蘇秦說韓宣惠王曰韓北有鞏洛成

臯之固西有宜陽商阪之塞東有宛穰

正義曰南陽二縣

消

水南有陘山

正義曰在新鄭西南三十里

地方九百餘里鄙諺曰

寧為雞口無為牛後

正義曰雞口雖小猶進食牛後雖大乃出糞也

今西面

交臂而臣事秦何異於牛後乎韓王勃然作色攘臂

瞋目按劍仰天大息曰寡人雖不肖必不能事秦次

說魏惠王曰魏南有鴻溝

徐廣曰在滎陽

陳汝南許鄆昆陽

召陵舞陽新都新鄭

並在潁川汝南南陽

東有淮潁煮棗

徐廣曰在

兗沂水出泰山蓋縣黃即陳留外黃西有長城之界北有河水卷

正義曰卷在鄭州原武縣北衍酸棗正義曰在滑州地方千里武士二十

萬荀御所謂魏之武卒也蒼頭二十萬正義曰以青布裹頭奮擊二十萬

廝徒十萬正義曰謂烹炊供養雜役也今乃欲事秦事秦必割地

以効實兵未用而國已虧矣魏王曰敬以國從因東

說齊宣王曰齊南有泰山東有瑯琊西有清河北有

渤海此所謂四塞之國也三軍之良五家之兵管子制國

五家為軌十軌為里四里為連十連為鄉以為軍令進如鋒矢戰如雷霆解如

風雨

荀卿所謂齊之技擊也

秦之攻齊倍韓魏之地過衛陽晉

正義曰衛地曹濮等州也陽晉在曹州乘氏縣西北

之道徑乎亢父之險

正義曰在

兗州任城縣南

故恫疑噓喝而不敢進則秦不能害齊亦明

矣今乃西面而事秦臣竊羞之齊王曰敬以國從乃

西南說楚威王曰楚西有黔中

正義曰今閬州楚黔中郡其故城在辰州

西二 巫郡

正義曰夔州巫山縣

東有夏州

裴駟曰按左傳楚莊王伐陳鄉取一人焉

以歸謂之夏州而注者不說夏州所在車角撰桓溫集云夏口城上數里有洲名夏州

海陽南

有洞庭蒼梧

正義曰蒼梧山在道州南

北有陜塞

即陜山

郢陽

徐廣曰或

者今之順陽乎正義曰順陽故城在鄧州穰縣西

地方五千餘里帶甲百萬

從合則楚王衡成則秦帝二者何居焉楚王曰寡人之國西與秦接境秦有舉巴蜀并漢中之心秦虎狼之國不可親也而韓魏迫於秦患不可與深謀深謀恐反人以入於秦故謀未發而國已危矣寡人自料以楚當秦不見勝也內與羣臣謀不足恃也寡人卧不安席食不甘味心搖搖然如懸旌而無所終薄今主君欲一天下收諸侯存危國寡人謹奉社稷以從

括蒼鮑氏曰五國之聽蘇秦也面從而已非能深究從橫之利害也惟楚威王有難秦之心而患諸國之不可合念之熟矣蘇秦為從約長并相六國北告趙異夫稱敬從者也

王行過洛陽周顯王聞之恐懼除道使人郊勞昆弟

妻嫂側目不敢仰視蘇秦喟然嘆曰使我有洛陽負

郭田二頃吾豈能佩六國相印乎

北雖鄙夫驕滿之說然學校廢而士

失其教井田壞而士無以養此游士所以散於天下而稷亂所以不息也所繫豈不大乎哉趙肅

侯封為武安君乃投從約書於秦餘見通鑑其說六

國辭有與當時事不合者皆辯士所增飾也

公子成與李兌

弑主父於沙丘而說趙之辭乃謂奉陽君捐館舍當是時秦之勢未能勝齊楚而說齊楚之辭皆曰西面而事秦後此二十年張儀連橫說楚懷王猶曰長為昆弟之國況楚威之世乎凡此類皆後人所增也

秦以公孫衍為大良造

解題曰賞雕陰之功也戰國游說之風蘇秦張儀公孫衍實倡之自是而後不可勝紀矣秦周人也儀與衍皆魏人也故言權變辯智之士者必曰三晉兩周云按張儀傳太史公曰三晉多權變之士夫言從衡強秦者大抵皆三晉之人也戰國策石行秦謂大良造曰欲決霸王之名不如備兩周辯智之士

周顯王三十七年秦使公孫衍激齊魏伐趙從約遂解
解題曰徐廣曰自初說燕至此三年史記謂秦兵不
敢出函谷關十五年非也當以徐廣之說為正

魏以陰晉與秦

解題曰魏納陰晉以和秦更名曰寧秦蓋陰晉乃華

陰函谷關之所在

左傳桃林之塞即此地

故喜得之也

齊伐燕

解題曰齊宣王因燕喪伐燕取十城易王謂蘇秦曰

往日先生至燕而先王資先生見趙遂約六國從今
齊先伐趙次至燕以先生之故為天下笑蘇秦遂往
說齊宣王曰燕雖弱秦之少婿也大王利其十城而
長與強秦為仇乎齊乃歸之蘇秦去年合從力詆衡
人以秦恐喝諸侯今年乃自為此言大抵辯士之論
皆如此

周顯王三十八年義渠內亂

解題曰義渠西戎之屬於秦者也不乘其亂而滅其

國乃為出師討定之猶有大國之義焉

周顯王三十九年焦

解題曰史記正義曰焦城在陝州城內東北武王克商封神農之後於焦後封姬姓是時屬魏

魏以少梁與秦

解題曰秦本紀書魏納河西地年表書魏入少梁河西地于秦蓋孝公取河西地之時尚有未盡者也按戰國策繆留謂韓宣惠王曰魏用犀首

即公孫衍也
司馬彪曰犀

首魏官名若今虎牙將軍張儀而西河之外亡孝公取河西地蓋

商鞅之力至是盡得河西地則犀首張儀之力也是時公孫衍張儀皆信用於秦以事理推之惠王以其皆魏人兩厚之觀收其用而儀衍爭利互相傾奪卒至於賣其宗國以媚秦也

周顯王四十年取汾陰皮氏拔焦

解題曰汾陰城在蒲州汾陰縣北皮氏在絳州龍門

縣西

並見史記正義

焦去年所圍者也按魏年表世家後年

書秦歸我焦曲沃則曲沃亦嘗拔矣

楚莊躋自王于滇

解題曰按西南夷傳楚威王時使將軍莊躋將兵循江上畧巴蜀黔中以西莊躋者故楚莊王苗裔也躋至滇池地方三百里旁平地肥饒數千里以兵威定

屬楚欲歸報會秦擊奪楚巴黔中郡

秦奪楚巴黔中
去威王薨五十

年恐道塞不通因還以其衆王滇變服從其俗以長

之漢元封二年滇王舉國降

魏伐楚取陘山

解題曰按楚世家魏聞楚喪取我陘山所謂北有汾

陘之塞也

徐廣曰在密縣北氏曰召陵陘亭

又按戰國策楚魏戰於

陘山魏許秦以上洛

屬弘農

以絕秦於楚魏戰勝楚敗

於南陽秦責賂於魏魏不與管淺謂秦王曰王何不

謂楚王曰魏許寡人以地今戰勝魏王背寡人也何

不與寡人遇魏畏秦楚之合必與秦地矣是魏勝楚

而亡地於秦也秦王曰善以是告楚楚王揚言與秦

遇魏王聞之恐効上洛於秦

周顯王四十一年離石

解題曰離石縣今屬石州

公子華蒲陽

解題曰年表公子華作公子桑史記正義曰蒲陽在

隰州隰川縣

魏納上郡

解題曰張儀既取蒲陽而復歸之故魏以上郡為謝

也魏世家書盡入上郡于秦豈上郡所統不止十五

縣前此有為秦所取者與春秋之時郡屬於縣趙簡

子哲言衆所謂上大夫受縣下大夫受郡是也

杜預注曰周書

作維篇千里百縣縣有四郡戰國之時縣屬於郡此所謂上郡十

五縣是也方孝公商鞅時并小鄉為大縣縣一令尚

未有郡及守稱及魏納上郡之後十餘年秦紀始書

置漢中郡或者山東諸侯先變古制而秦效之歟

按戰

國策城渾而游於楚至於新城說其今日鄭魏者楚之要國而秦者楚之強敵也鄭魏之弱而楚以上梁

應之宜陽之大也楚以弱新城圖之蒲坂平陽相去
百里秦人一夜而襲之安邑不知新城上梁相去五
百里秦人一夜而襲之上梁亦不知也夫邊邑之所
恃者非江南泗上也故王何以不新城為主郡也邊
邑甚利之新城公大說乃使城渾之楚楚王果以新
城為主郡以此攷之則郡之所治必居形勢控扼之
地也郡者縣之主郡史記正義曰魏前納陰晉次納同丹
主故謂之主郡
二州今納上郡而盡河西濱洛之地矣括地志云上
郡故城在綏州上縣東南五十里按丹廊延綏等州
北至勝州固陽並上郡地輿地廣記云上郡乃今麟
延安丹坊廊銀夏綏德保
安之
地

秦陳軫奔楚

解題曰陳軫與張儀俱事秦惠王皆貴重爭寵張儀惡陳軫於秦王曰軫欲去秦而之楚王問陳軫軫曰賣僕妾不出閭巷而售者良僕妾也出婦嫁於鄉曲者良婦也今軫不忠於君楚亦何以軫為忠乎忠且見棄軫不之楚何歸乎王以其言為然遂善待之居秦期年秦惠王終相張儀而陳軫奔楚

周顯王四十二年秦縣義渠

解題曰義渠後復見蓋雖以為縣猶令其君主之故
其後復國也

周顯王四十三年秦初臘

解題曰臘者蜡之別名也風俗通云按禮傳夏曰嘉
平殷曰清祀周曰大蜡秦漢曰臘春秋時宮之奇已
稱虞不臘矣則非始於秦也特秦前此未嘗為臘惠
王始講之耳如始皇更名臘曰嘉平亦復用夏之舊
名也蔡邕獨斷云臘者歲終大祭縱吏民宴飲後漢

志亦曰季冬之月勞農大享臘與禮記蜡祭之義略
同秦年表書初臘會龍門意者勞農宴飲於此地歟
龍門山屬同州韓城縣

秦楚燕齊魏各出銳師萬人會趙葬


解題曰左傳諸侯之大夫會晉平公葬鄭子皮將以
幣行子產曰用幣必百兩百兩必千人既葬諸侯之
大夫欲因見新君叔向辭之諸侯大夫皆欲見新君
必皆以幣行其徒必不減千人也以千人會葬既號

侈矣今五國會趙葬至於各出銳師萬人視春秋又

十倍焉送死淫靡如此民不堪命可知矣

呂氏春秋節喪篇世

俗之行喪載之以大輜引紼者左右萬人以行之以軍制立之然後可當時葬送之侈如此則諸侯以萬人會葬不足怪也



大事記解題卷三